


SUID-AFRIKAANSE INKOMSTEDIENS**NO. 748****24 JUNIE 2016****VERDERE OORWEGINGS INGEVOLGE ARTIKEL 80(2) VAN DIE WET OP BELASTINGADMINISTRASIE, 2011 (WET NO. 28 VAN 2011) TEN OPSIGTE WAARVAN 'N AANSOEK OM 'N BINDENDE PRIVAATBESLISSING OF 'N BINDENDE KLASBESLISSING AFGEKEUR KAN WORD**

Ingevolge artikel 80(2) van die Wet op Belastingadministrasie, 2011, bepaal ek, Thomas Swabihi Moyane, Kommissaris vir die Suid-Afrikaanse Inkomstediens, in die aangehegte Bylae, die verdere oorwegings ten opsigte waarvan 'n aansoek om 'n bindende privaatbeslissing of 'n bindende klasbeslissing afgekeur kan word.

Hierdie openbare kennisgewing vervang alle vorige kennisgewings wat uitgereik is kragtens artikel 80(2) van die Wet op Belastingadministrasie, 2011, vanaf die datum van publikasie hiervan.

**THOMAS SWABIHI MOYANE****KOMMISSARIS VIR DIE SUID-AFRIKAANSE INKOMSTEDIENS**

BYLAE**1. Algemeen**

Enige woord of uitdrukking in hierdie kennisgewing vervat waaraan 'n betekenis ingevolge 'n 'Belastingwet' soos omskryf in artikel 1 van die Wet op Belastingadministrasie, 2011, toegeskryf is, dra die betekenis aldus daaraan geheg, tensy dit uit die konteks anders blyk.

2. Lys van verdere oorwegings ten opsigte waarvan die Kommissaris 'n aansoek om 'n bindende privaatbeslissing of 'n bindende klasbeslissing kan afkeur

Die aangeleenthede ten opsigte waarvan SAID 'n aansoek om 'n bindende privaatbeslissing of 'n bindende klasbeslissing kan afkeur, word hierby deur die volgende items vir die onderskeie Belastingwette uitgebrei:

2.1. Inkomstebelastingwet, 1962 (Wet No. 58 van 1962)

2.1.1 Die bepaling van die toelaag soos bedoel in artikel 24C(2).

2.1.2 Die effek van 'n salarisopoffering vir doeleindes van "vergoeding" soos omskryf in paragraaf 1 van die Vierde Bylae.

2.1.3 Die vertolking en toepassing van die vrystelling ingevolge artikel 10(1)(c)(v), ten opsigte van enige ooreenkoms voor 1 Januarie 1990 aangegaan.

2.1.4 Die aftrekbaarheid van enige uitgawe aangegaan deur 'n werkgewer om die werkgewer se na-aftrede mediese fonds verpligting teenoor voormalige of huidige werknemers (uitgesluit aftrekkings ingevolge artikel 12M), geheel of gedeeltelik oor te dra of uit te wis, spesifiek ingesluit, maar nie beperk nie tot—

- (a) enkelbedragbydraes aan pensioen-, voorsorg- of bystandsfondse;
- (b) enkelbedrag skikkingsbetalings direk aan werknemers gemaak;
- (c) premies deur die werkgewer betaal om annuïteitspolis te verkry.

2.1.5 Aansoeke wat handel oor inwoner- of belastingstatus, wat insluit—

- (a) die bepaling van die plek van effektiewe bestuur vir doeleindes van die omskrywing van "inwoner" in artikel 1(1);
- (b) enige bepaling of 'n "buitelandse besigheidsaak" met verwysing na 'n beheerde buitelandse maatskappy bestaan vir doeleindes van die omskrywing van daardie term in artikel 9D(1);

(c) enige bepaling of 'n "permanente saak" soos omskryf in artikel 1(1) ontstaan het.

2.1.6 Of vergoeding "billike markwaarde" vir doeleindes van Deel V van Hoofstuk II sou uitmaak.

2.1.7 Enige uitoefening van die Kommissaris se diskresie kragtens artikel 58(1) om te bepaal of die vergoeding gegee vir die beskikking oor eiendom voldoende is.

2.2. Wet op Belasting op Toegevoegde Waarde, 1991 (Wet No. 89 van 1991)

2.2.1 Die aanspreeklikheid vir belasting van 'n verskaffer van goedere of dienste wat nie 'n party tot die aansoek is nie.

2.2.2 Die bevoegdheid om insetbelasting af te trek ten opsigte van goedere of dienste verkry deur 'n persoon wat nie 'n party tot die aansoek is nie.

2.2.3 Aansoeke wat vereis dat die Kommissaris moet bepaal dat 'n persoon as 'n agent of prinsipaal ten opsigte van die lewering van goedere of dienste optree.

2.2.4 Die toepassing van artikel 8(15) en of die lewering van goedere of dienste 'n enkele lewering uitmaak.

2.2.5 Bevestiging dat die uitreik van 'n belastingfaktuur of debiet- of kredietnota voldoen aan die vereistes van enige wetgewing met betrekking tot elektroniese kommunikasies, of dat enige tegniese vereistes ten opsigte van elektroniese fakturering nagekom word.

2.2.6 Bevestiging dat die lewering van huisvesting of 'n reg om 'n gebou of 'n gedeelte daarvan te beset, "kommersiële huisvesting" uitmaak.

2.2.7 Bevestiging dat 'n lewering deur 'n "welsynsorganisasie" aan 'n openbare bestuur of 'n munisipaliteit ingevolge artikel 11(2)(n) vir die nulkoers kwalifiseer.

3. Ander oorwegings

3.1 Aansoeke om aanwysings of sertifikate ingevolge die wette wat deur die Kommissaris geadministreer word indien ander meganismes beskikbaar is deur middel waarvan daardie aanwysings of sertifikate verkry kan word.

3.2 Aansoeke rakende die toeskrywing, toedeling of verdeling van uitgawes of insetbelasting vir doeleindes van inkomstebelasting of belasting op toegevoegde waarde. 'n Versoek vir die goedkeuring van 'n alternatiewe toedelingsmetode mag ingevolge artikel 41B van die Wet op Belasting op Toegevoegde Waarde, 1991, gedoen word.

- 3.3 Aansoeke rakende die belastinggevolge van transaksies vervat in ooreenkomste wat reeds aangegaan is, behalwe versoeke vir—
- (a) beslissings of klasbeslissings ingevolge artikel 41B van die Wet op Belasting op Toegevoegde Waarde, 1991; of
 - (b) die verlenging van die geldigheid van 'n beslissing, voor die vervaldatum daarvan, indien die feite (ingesluit al die terme van die transaksie), die toepaslike bepalinge van die relevante wetgewing en die geldende regsbeginsels dieselfde gebly het.
- 3.4 Aansoeke ten opsigte waarvan die aansoeker nie alle belastingopgawes gelewer het of enige belasting nie betaal het voor die betaaldatum nie, tensy reëlins aanvaarbaar vir die SAID gemaak is.